

EG 763 Hymnus aus dem Johannes-Evangelium uff Schwäbisch

Em Oofang war s'Wort,
on s'Wort war bei Gott,

on Gott selber war s'Wort.
On des war von Oofang oo bei Gott.

Ällas, was isch, isch durch s'Wort komma,
on ohne s'Wort gäb's nix von dem, was isch,

Em Wort isch s'Leba gwä,
on s'Leba war s'Licht fir d'Menscha.

On s'Licht scheint hell em Donkla,
on s'Donkle hot s'Licht net neiglassa.

Dr Herr isch en des komma, des eem gheert;
on dia eem gheerat, hen een net oognomma.

Dia abbr, dia een oognomma hen
on dia an sein Nama glaubat,
werdat doodurch zu Gotteskender.

On s'Wort isch zu Fleisch worda on bei ons eizoga,
on mir hen gseah, wia herrlich es isch,

so herrlich als wär dr Bua grad wia dr Vadder,
on oogfüllt mit viel Gnad on viel Wohrat.

On aus dera Füll hen mir alle gnomma
viel Gnad on no meh Gnad.

Ehr sei em Vadder on seim Sooh on em heilige Geischt.
So wia des scho emmr war, on au bleiba wird,
heit on bis en alle Ewigkeit. Amen, Amen.

Ausgeweelte Psalma uff Schwäbisch



Psalm 23 uff Schwäbisch

Dr Herrgott isch mei guater Hirt,
deshalb wird mir's an nix fehla.

Er weidat mi em saftiga Wiesagrund
on brengt mi emmr an a frischs Wässerle.

Er macht mei Seel frisch on frei.
Er fihrt mi uff dr richtiga Schdrooß,
uff sein guata Ruaf koo i mi vrlassa.

On au wenn's ammool durch an donkla Hohlweg gooht,
han i koi Angscht,

weil du emmr bei mr bisch,
dei Hirtaschtab isch mei ganzer Troscht.

Du decksch mr dr Disch,
on meine Feind miaßat mr beim Feschtesta zuagugga.

Du lesch Salbeel ibr meine Hoor laufa
on schenksch mei Glas emmr voll.

Mei ganz Leebe lang wirsch du guat on barmherzig zu mir sei,
on fir emmer on ewich werd i en deim Haus bleiba!

Ehr sei em Vadder on seim Sooh on em heilige Geischt.
So wia des scho emmr war, on au bleiba wird,
heit on bis en alle Ewigkeit. Amen, Amen.

Psalm 121 uff Schwäbisch

Meine Auga gugget nuff uff d'Berg:
Kommt do oiner on hilft mir?

Mei Hilf kommt vom Herrgott,
der dr Hemml on dia Welt doo gmacht hot.

Er hebt dein Fuaß, dass r net ausrutscht,
on der wo uff di uffbasst, schloft net.
Gugg gnau noo: Der wo uff Israel uffbasst, schloft koi bissle.

Dr Herrgott basst uff di uff;
er legt an Schatta ibr dei rechta Hand,

der di dagsibr vor em Sonnaschtich schitzt
on en dr Nacht vor em Mondschei.

Dr Herrgott soll di vor ällam Beesa schitza,
er soll uff dei Seel uffbassa.

Dr Herrgott soll uff di uffbassa,
wenn d' naus goosch on wenn d' rei kommsch,
heit on morga on fir emmr!

Ehr sei em Vadder on seim Sooh on em heilige Geischt.
So wia des scho emmr war, on au bleiba wird,
heit on bis en alle Ewigkeit. Amen, Amen.

Psalm 118 uff Schwäbisch

Dankat älle em Herrgott, der so freindlich isch,
on der's en älle Ewigkeit guat mit ons moint!

Er alloi isch mei Kraft on mei Lobliad
on mei Heiland.

Dia vor Gott recht sen, sengat en ihre armselige Hütta
vor Freid a Siegesliad:

Em Herr sei Macht isch deitlich zom Seha,
em Herr sei Macht wird sich emmr durchsetza!

Dr Schdoi, den se uff dr Bauschdell aussordiert hen,
isch zom Fundament worda.

Des hot dr Herrgott selber gmacht,
on s'isch a Wonder en onsre Auga.

Heit isch dr Dag, den dr Herrgott gmacht hot –
kommat, lassat ons feira on frehlich sei!

O Herr, hilf ons!
O Herr, lass ällas guat werda!

Mir lobet den, der em Nama von onserm Herrgott herkomma isch.
Mir segnat eich, wenn ihr en sei Haus gherat.

Er alloi isch onser Gott, der ons sei Licht leichta lesst.
Wicklat Girlanda om dr Altar, machat des Fescht schee!

Mei Herr on Gott, i will dir danka
on dir a Lobliadle senga, weil du mei Gott bisch.

Dankat älle em Herrgott, der so freindlich isch,
on der's en älle Ewigkeit guat mit ons moint!

Ehr sei em Vadder on seim Sooh on em heilige Geischt.
So wia des scho emmr war, on au bleiba wird,
heit on bis en älle Ewigkeit. Amen, Amen.

Psalm 34 uff Schwäbisch

I will di loba, Herr, äll Dag,
on emmer laut a Lobliad uff di senga.

Mei Seel isch stolz, weil se di kennt,
on wer elendich droo isch, solls heera on sich iber di freia.

Kommat on sengat mit mr a Lobliad uff onsern Gott,
dass mr mitnandr sein Nama groß machat!

Wia'ne Gott gsuacht han en meiner Angscht,
hot'r mi gheert on me aus em Loch zoga.

Wer een ooguckt, schdrahlt vor lauter Freid ibers ganz Gsicht,
on koiner muaß sich wegga eem scheema.

Wer sich en seim Elend an Gott wendat,
wird erleba, wia'nr hilft en dr Not.

Gott schickt sein Engel zu deene, dia voller Ehrfurcht uff een heera,
dass er eene hilft, wenn se'n brauchat.

Gugg gnau noo on lass dr's uff dr Zong vrganga,
wia freindlich onser Gott isch!
Älle, dia eem trauet, sollat's guat han!

Guggat emmr uff een on sei Wort, wenn'r zu eem gherat!
Weil wer voller Ehrfurcht uff een guggt, kommt nia z'kurz.

Wer bloß uff's Geld guggt, griagt echta Hunger on darbt am End,
abbr wer sich uff dr Weg zu Gott macht,
muaß koin Mangel an gar nix firchta.

Dr Herr heert älle, dia eem vrtrauat on nach eem schreiat
on rettet se aus älle ihre Sorga.

Wem's Herz brocha isch, dem isch Gott ganz nääch,
on wens oim's Gmiat vrhaglt hot, dem hilft er gwieß.

Wer nach em Recht guggt, muaß zwar viel eischdegga,
abbr am End hilft eem dr Herrgott aus ellam raus.

Dr Herr kauft elle frei, dia eem dienat,
on wer eem vrtraut, dem nemmt'r sei Schuld weg
fir emmr on ewig.

Ehr sei em Vadder on seim Sooh on em heilige Geischt.
So wia des scho emmr war, on au bleiba wird,
heit on bis en älle Ewigkeit. Amen, Amen.

Psalm 36 uff Schwäbisch

Herr onser Gott, du bisch so guat wia dr Hemml weit isch,
on so woohr, wia d'Wolka weit ziagat.

Du bisch so gerecht wia deine Berg fescht schdandat,
on dei Recht isch so diaf wia d'greescht Diafe.
Herr onser Gott, du hilfsch deine Menschakender on au de Dierla.

Du bisch so guat, Herr onser Gott, des duat oifach guat,
on d'Leit fendat Schutz em Schatta von deine Fliegl.

Du machsch alle satt vom Ibrfluss aus deem Haus,
on koiner muaß Durscht han vor lauder Freid ibr di.

Du bisch d'Quell vom Fluss, der Leba schenkt,
on en deem Licht seahn mr di schtrahla!

Ehr sei em Vadder on seim Sooh on em heilige Geischt.
So wia des scho emmr war, on au bleiba wird,
heit on bis en alle Ewigkeit. Amen, Amen.

Psalm 98 uff Schwäbisch

Sengat em Herrgott a neis Liadle
ibr dia Wonder, dia er duat.

Er heilt ällas mit seinr rechta Hand
on mit seim Arm, der heilig isch.

Er zeigt alle Leit sei Heil,
on alle Völkr kennat sei Gerechtigkeid erkenna.

Er vrgisst nia, dass r Israel gnädich isch on treu,
on alle Welt koo sei Heil seha.

Juchzet onserm Herrgott, alle Leit!
Sengat on schbrenge on lobat!

Lobat een mit eire Harfa
on mit alle Saitainschdrument!

Juchzet eem mit eire Trompeta on Posauna,
weil er isch dr Herrgott, onser Keenich!

S'Meer soll brausa on ällas, was dren lebt,
dr ganze Erdball on alle, dia druff wohnat.

D'Fliss sollat ihr Wassr danza lassa,
on d'Berg sollat freelich sei vor em Herrgott;
weil r kommt on dia ganz Welt recht macht.

Er wird dr Erdball recht macha durch sei Gerechtigkeid
on alle Völkr so, wia's recht isch!

Ehr sei em Vadder on seim Sooh on em heilige Geischt.
So wia des scho emmr war, on au bleiba wird,
heit on bis en alle Ewigkeit. Amen, Amen.